

## LAMAN KAMPUS JAN 08

### **‘Tahun Baru Dengan Jiwa Melayu Muslim!’**

Oleh: Ummu Hani Abu Hassan ([www.hanihassan.blogspot.com](http://www.hanihassan.blogspot.com))

Nikmat Allah yang paling besar kepada masyarakat di Alam Melayu ialah agama Islam yang didatangkan melalui para pedagang Muslim dari China, India dan Arab pada kurun ke-13 masihi. Kekuatan para pedagang ini menyampaikan Islam secara berhikmah, tepat dan analitikal berupaya mengetuk pintu hati golongan elit Melayu ketika itu yang terdiri daripada raja dan pembesar istana seterusnya rakyat jelata untuk memeluk Islam. Sejak itu, Islam membuka lembaran baru kepada ketamadunan Melayu mendasari tiap posisi kepercayaan, budaya dan resam, bahasa, kesenian dan tingkah-laku seperti mana Islam memunculkan peradaban semula Eropah selepas kejatuhan zaman gelapnya. Mengapa Islam? Jawapannya ialah Islam adalah agamaNya yang khusus menepati apa yang bernama kesejahteraan, perpaduan dan kesungguhan. Firman Allah Taala:

*“Pada hari ini telah Kusempurnakan bagimu agamamu, dan telah Kucukupkan nikmatKu kepadamu, dan telah Kuredhakan Islam itu menjadi agama untukmu.”* (al-Maidah: ayat 3)

Namun, serangan pemikiran yang dilancarkan pasca perang kolonial barat mulai menghakis jatidiri Melayu yang sedikit sebanyak turut melukakan Islam. Pandanglah wajah anak-anak muda Melayu hari ini, apakah mereka memahami makna Melayu dalam erti kata Islam yang syumul? Memang Islam itu tidak diturunkan kepada budaya dan bangsa tertentu sekalipun bangsa Arab, tetapi dengan memahami Islam, nescaya akan semakin cinta dan suburlah rasa patriotik kita kepada jatidiri Melayu.

Saat varsiti kami menerima ramai pelajar-pelajar dari luar negara terutama negara-negara serumpun iaitu Indonesia, Brunei, Singapura dan Pattani, ia sebenarnya sesuatu yang bermakna buat para pelajar tempatan. Apa tidaknya, pengalaman teman-teman ini boleh dijadikan ransangan untuk lebih memaknakan persaudaraan Melayu serumpun. Malangnya, tidak ramai yang mengambil peluang. Saya baharu sahaja memulakan rangka ukhwah dengan beberapa teman antaranya Abidah, Kak Ifah dan Ustaz Hafiz dari Singapura serta teman-teman dari Indonesia seperti Imron Baehaqi, Masrur, Samhari, Amar dan Pakcik Saifullah. Sangat senang bergaul dengan mereka. “Malaysia membentangkan rezki pada kami. Di samping belajar, kami boleh juga bekerja untuk menyara hidup,” kata Samhari. “Kami datang ke Malaysia ni berbekal Bismillah (Bismillah bermaksud tawakal penuh) saja ukh,” jenaka Buddy menjelaskan kesungguhan anak-anak muda Indonesia untuk belajar di Malaysia.

Lain pula teman-teman dari Singapura. Sebagai kelompok minoriti di sebuah negara maju pimpinan pemerintah non Muslim, mereka lebih selesa memilih Malaysia sebagai destinasi ilmu. “Ruwit sis! Singapura mengandungi banyak undang-undang yang meminggirkan pribumi Melayu. Lihat saja, tanah-tanah orang Melayu dibeli dengan murah kemudian dijual kepada pelabur asing begitu mahal hingga mencecah jutaan ringgit. Segala keistimewaan orang Melayu sebagai penduduk asal negara dihapuskan

dengan tujuan memberi hak kesamarataan kepada semua bangsa. Akibatnya, orang Melayu Singapura terpaksa ‘berlari’ untuk duduk setaraf dengan para imigran yang dimonopoli masyarakat Cina,” kata Ustaz Hafiz, anak kelahiran Singapura yang kini menetap di Chua Chu Kang. Saya membandingkan teman-teman dari Indonesia dan Singapura. Sekelompok dari negara yang sederhana KDNKnya akibat ramai rakyat yang masih dikategorikan miskin, sekelompok pula dari negara maju yang sentiasa bersaing. Lalu, mengapa mereka memilih Malaysia? “Ukh, Malaysia sangat mudah. Fasilitas kuliah, pekerjaan sampingan dan matawang RM yang stabil membuatkan ia pilihan kami,” tambah teman dari seberang. Betul kata teman itu. Malaysia bukan sahaja membentangkan kemudahan fizikal kepada mereka, yang paling utama ialah kesejahteraan dan penghayatan Islam yang masih kukuh di kalangan sebahagian besar orang Melayu di Malaysia.

Sewaktu menjadi urusetia program Serumpun Sebudaya anjuran PENA bulan lalu, saya bertemu dengan budayawan-budayawan dari negara rumpun Melayu Polinesia antaranya Saudara Mohd Raman Daud (Singapura), Tuan Haji Abdul Hakeem (Brunei) Ibu Fatin Hamamah (Indonesia) dan beberapa nama besar yang lain. Masing-masing membicarakan tentang pergolakan budaya Melayu yang kian ditelan arus global di negara sendiri. Paling menyedihkan saya kala budayawan Pattani, Abdul Razak Pandangmalam mengakui bahawa bahasa Melayu kian pupus di kalangan generasi muda Melayu di wilayah Selatan Thailand. Jelasnya, ada sesetengah kampung di Pattani, anak-anak mudanya sudah tidak pandai berbahasa Melayu sekalipun mereka adalah orang-orang Melayu. Dalam pembentangannya, beliau menyeru supaya orang-orang Melayu di Malaysia dapat memulihkan ‘keadaan tenat’itu. “Dari segi ekonomi, kami tidak begitu runcing kerana semiskin-miskin orang Melayu di Pattani masih mempunyai tanah. Yang parahnya ialah generasi muda kami kian kehilangan identiti Melayu termasuk bahasa ibunda mereka,” kata saudara Abdul Razak.

Teman mahasiswaku, sempena tahun baru ini moleklah kita melihat ke dalam diri, apakah perasaan kita terhadap jatidiri Melayu-Muslim yang semakin usang disimpuh kemodenan? Malaysia yang kita cintai memiliki kemahsyuran sebagai negara membangun yang gagah termasuk berjaya menakluk aeroangkasa. Namun, jangan kerana sibuk meniru dan meletakkan bangsa lain di haraki tertinggi, kita meminggirkan nilai budaya asal; seorang Melayu beragama Islam!

*‘Apa tanda Melayu jati,  
Ilmu bermanfaat ia minati,  
Apa tanda Melayu jati,  
Orang berilmu ia dekati,  
Apa tanda Melayu berakal,  
Ilmu dituntut menjadi bekal’*

(Pak Tenas Effendy, 1994)